


ANG

Pahayagan ng Partido Komunista ng Pilipinas
Pinapatubayan ng Marxismo-Leninismo-Maoismo

Bayan

Edisyong Bisaya
Bolyum LI Ihap 20
Oktubre 21, 2020
www.cpp.ph



EDITORIAL

Mangahas nga makigbisog ug magprotesta taliwala sa pandemya

Ang panahon sa pandemya mao ang panahon sa pagprotesta ug pagsukol sa katawhan sa mga tiranong nagyatak sa ilang kagawasan, nagpasagad sa pangpublikong panglawas ug labaw pang nagpaantus sa katawhan.

Sa lain-aling bahin sa kalibutan, malukpanong milihok ang katawhan sa mga demokratikong pagsukol. Gipakita nila nga dili babag ang pandemya sa pagsukol, mahinungdanon pa gani nga makigbisog atubangan sa gipagrabeng pagpangdaug-daug ug pagpanumpo sa takuban pandemya. Gikan sa US, Indonesia, Thailand ug uban pang nasud, minilyong katawhan ang midagsa sa kadalanan aron suklan ang pasismo ug tiranya sa pipila.

Gigamit niya ang militaristang lockdown aron ipakontrol sa pulis ug militar ang inadlaw-adlaw nga

kinabuhi sa katawhan, pugos nga ginapalagyo ang mga tawo ug pugngan silang maghiusa ug mosukol. Gibagnod ni Duterte sa utok sa mga tawo ang sayop nga pangatarungan nga “bakuna lang ang solusyon” aron tabunan ang kamatuurang dili niya kayang pangulohan ang nasud sa ingon niining panahona.

Sukad sa sinugdanan, tulog sa pansitan ang rehimen ni Duterte. Sundalo dili duktor ang nangulo. Militaristang lockdown ang solusyon. Gitalikdan ang responsibilidad sa estado ang mga lakang

“Mangahas...,” sundi sa panid 2

7 ka armas nakumpiska sa Surigao del Sur

PITO KA ARMAS ang nakumpiska sa Bagong Hukbong Bayan (BHB)-Surigao del Sur sa walay buto nga reyd sa istasyon sa Philippine Coast Guard (PCG) sa Barangay Wakat, Barobo, Surigao del Sur niadtong Oktubre 12. Hubog ang mga elemento sa PCG ug pakayas silang depensahan ang ilang istasyon. Nakumpiska sa BHB ang .30 kalibreng *machine gun*, upat ka ripleng M16, duha ka .45 pistola, lima ka *ammo vest*, duha ka radyong pangkomunikasyon ug gatusan ka mga bala.

Paspas nga nakontrol sa mga Pulang manggugubat ang ilang target sulod lamang sa pipila ka minuto. Luwas usab nga nakaatras ang mga pwersa

“7 ka armas...,” sundi sa panid 3

"Mangahas..." gikan sa panid 1

alang sa kaluwasan: walay libreng *mass testing*, walay libreng pagtambal sa Covid-19. Mihakop og kita ang mga kapitalista ug mga kawatan samtang padayon nga miku-yanap ang bayrus. Kadaghanan sa mga natakdan napugos nalang nga magtipid kaysa mamatay sa gasto sa ospital.

Sa pandemya, pagpanumpo ug pulitika ang prayoridad ni Duterte. Giguba niya ang ekonomiya ug panginabuhian sa masa. Giunlod sa utang ang katawhan. Pagpamatay, pagpanumpo ug pagpanghadlok batok sa mga kritiko. Hugaw nga geyra sa kabanikanhan. Dagkung kapitalista ug mga kroni ang nakabenipisyo. Mas hugot nga kontrol sa kongreso. Walay-pugong nga mga lakang aron magpabili sa pwesto.

Nagbukal-bukal ang dugo sa kasuko sa katawhang Pilipino sa pagpasagad, pagpaantus ug pagpanumpo sa pasistang rehimeng Duterte. Walay kapares nga pag-antus ug pagpangdaug-daug ang nasinati sa mga mamumuo, mag-uu-

ma, mga walay panginabuhian, mga magtutudlo, nars, empleyado, kabatan-onan, Lumad ug mga Moro. Nangita og pabor ug naghulat sa hustong higayon ang tibuok katawhan nga ipakita ang nagdilaab nga kasuko batok sa tiranya ni Duterte.

Gusto sa tibuok katawhan nga makigbugno sa nagharing rehimen ug kusganong makigbisog batok sa terorismo, korapsyon ug nasudnong pagtraydor ni Duterte. Gusto nilang tibuok-kusog nga suklan ang Anti-Terror Law, ang badyet alang sa pasismo ug *pork barrel*, ang mga proyektong pang-imprastrukturang paantus sa masa, ang palisiyang pagkibhang sa suhulan sa mga mamumuo, ang planong dugang buhis sa masa ug pagpa-ubos sa buhis sa dagkung kapitalista, ang palisiya nga nagsalig sa langyawng pautang, ang planong usabon ang konstitusyon ug uban pang iskema aron magpabilin sa poder ang pundok ni Duterte.

Anaa sa abaga sa mga abanteng pwersang patriyotiko ug demokratiko nga pangulohan ang ti-





buok katawhan sa ilang pagsukol. Responsibilidad nilang ipakita ang kaisog, militansya ug kahibalo atubangan sa sistematikong atake sa rehimen batok sa ilang han-ay. Samtang nagmaampingon sa pandemya, kinahanglang tibuok-pangingkamot nilang abton, pukawon, organisahon ug palihukon ang minilyong katawhan. Kinahanglang pangulohan ang malukpanong pagpalihok sa masa ug dad-on ang ilang kusog sa kadalanan—ang nag-unang nataran sa pagsukol ug pakigbugno sa tirano.

Daku ang papel sa mga kabatan-onan ug estudyanteng Pilipino sa pagpukaw ug pagpalihok sa tibuok katawhan. Kinahanglang mamugnaong hiusahon ang ilang kusog bisan og sirado ang mga kampus ug eskwelahan. Kinahanglang itransporta sa materyal nga pwersa ang katingbanong kahimatngon ug tinguha sa mga kabatan-onan alang sa demokrasya ug kagawasan. Kinahanglang silang magsilbing tingog sa tibuok katawhan sa pakigbisog batok sa tiranikong gahum.

Krusyal ang papel sa mga mamumuo sa pagbatok sa pasistang rehimeng Duterte. Sa tanang sektor sa kasyudaran, ang mga mamumuo ang adunay katakus nga magpakita og pinakadakung pwersang dungan-dungan nga magmartsa. Kinahanglang subsub nga itransporta ang mga pabrika ug mga komunidad isip mga eskwelahan aron ipataas ang kahibalo ug pagtuki sa kahimtang sa nasud, mga problema sa masang mamumuo ug katawhang Pilipino ug ang panginahanglang mapangahason nga mosukol. Kinahanglang abton ang gatasan ka mga pabrika, tukuron ang mga unyon ug asosasyon ug palihukon ang masang mamumuo aron iasdag ang ilang kaayuhan ug ang interes sa tibuok katawhan.

Ang malukpanong paglihok sa mga kabatan-onan, sa mga mamumuo ug kabus ang magsilbing uyok sa lapad nga panaghiusa sa uban

"Mangahas..." sundi sa panid 3

 <p>Bolyum LI Ihap 20 Oktubre 21, 2020</p> <p>Ang <i>Ang Bayan</i> ginapagawas sa pinulongang Pilipino, Bisaya, Iloco, Hiligaynon, Waray ug Ingles. Nagadawat ang <i>Ang Bayan</i> og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.</p> <p>  instagram.com/prwcnewsroom  @prwc_info  cppinformationbureau@gmail.com </p>	<h2 style="text-align: center;">Unod</h2> <p>Editorial: Mangahas nga makigbisog ug magprotesta taliwala sa pandemya 1</p> <p>7 ka armas, nasakmit sa Surigao del Sur 1</p> <p>Kadaugan sa mga unyon 3</p> <p>IRR sa ATA, gipagula na 3</p> <p>Bulan sa mag-uuma, gidumdum sa Mendiola 4</p> <p>Sukul! Mga protesta sa gawas sa nasud 4</p> <p>Yuta isip kapital, dili para sa pag-uma 4</p> <p>Hustisya para kang Baby River ug Ina! 5</p> <p>Bata, gipusil sa militar sa Bukidnon 5</p> <p>Paantus nga <i>distance learning</i> 6</p> <p>Pagpahimulos sa Amazon sa mga Pilipino 6</p> <p>Kahimtang sa migrante taliwala sa pandemya 7</p> <p>Sa mubong pagkasulti 8</p> <p>Ginabaybay sa grabeng krisis ang US 9</p> <p>Bahandi sa mga bilyunaryo, mitriple 9</p> <p>Miulbo nga kalihukang anti-rasismo 10</p>
<p style="text-align: center;">Ang <i>Ang Bayan</i> ginamantala duha ka hugna matag bulan sa Komite Sentral sa Partido Komunista ng Pilipinas</p>	

"Mangahas...", gikan sa panid 2

pang demokratikong pwersa. Pinaagi sa pagpakita sa kaisog ug militansya, sigurado nga mahimugso ang unos sa kasuko ug protesta alang sa kagawasan ug demokrasya.

Samtang ginaaslang sa kasyudaran ang lapad nga mga pakigbisog sa masa, padayon pang pasubsubon ug palapdon sa hukbong bayan ang gerilyang pakiggu-bat sa kabanikanhan aron silutan ang mga armadong gaway sa pasistang rehimen. Samtang mas daghang taktikal nga opensiba, mas nainat ang kaaway para dili lang nakapunting sa pagsumpo sa katawhan ang ti-buok pwersa niini. Samtang mas daghang kadaugan sa armadong pakigbisog, labaw nga nangahas ang katawhan nga makigbisog aron tapuson ang tiranya ni Duterte. **AB**

"7 ka armas...", gikan sa panid 1

luyo sa sagunson nga mga tsekpoynt sa nasudnong haywey.

Dugay nang ginareklamo sa mga mangingisda ang pagpangilkil kanila sa mga elemento sa PCG. Obligadong isurender sa mga mangingisda ang bahin sa ilang mga nakuhang isda sa mga pasista. Usa pa ka reklamo mao ang pagpangulata sa PCG sa usa ka bata.

Albay. Upat ka sundalo sa 49th IB ang patay ug napulo ang samaron sa pagpangambus sa BHB-Albay samtang gisubay ang utlanan sa mga Barangay Del Rosario ug Tobgon, Oas niadtong Oktubre 17. Tubag ang ambus sa nagapadayon nga nakapokus nga operasyon sa 9th ID sa prubinsya.

Bukidnon. Upat ka tropa sa AFP ang patay samtang tulo ang samaron human silang pabusikaran sa BHB-Bukidnon sa Barangay Salaysayon, Quezon niadtong Oktubre 9. Human ang panagsangka, walay-puas nga gibomba sa AFP ang lugar.

Misamis Oriental. Giparalisa sa BHB-Misamis Oriental ang tulo ka

trak ug bus sa multinasyunal nga korporasyong Del Monte Philippines, Inc. sa Sityo Talambao, Barangay Bulahan, Claveria, Misamis Oriental niadtong Oktubre 6.

Ayha niini, giharas usab sa usa ka yunit sa BHB niadtong Oktubre 5 ang mga elemento sa CAFGU nga nagsilbing pwersang pangseguridad sa makawkawong operasyon sa Mindanao Energy (MINERGY), kumpanyang nagaprodyus og kuryente ug naga-opereyt sa Barangay Quezon, Balingasag.

Tubag ang maong mga opensibang sa mga nakapokus nga operasyong militar sa AFP sa North Central Mindanao ug sa padayon nga operasyon sa mga magun-ubong plantasyon ug minahan.

Western Samar. Patay ang CAFGU ug notoryus nga paramilitar nga si Carlos Diaz sa ambus sa mga Pulang manggugubat sa Matuguinao niadtong Setyembre 28. Myembro si Diaz sa grupong Dos nga naila sa pagpamatay sa mga sibilyan sa maong prubinsya. **AB**

Kadaugan sa mga unyon, isangyaw

MALAMPUSON NGA NAPIRMAHAN ang *collective bargaining agreement* (CBA) tali sa United Coca-Cola Workers Union-IBM-KMU ug maneydsment sa Coca-Cola Beverages Philippines Inc. sa Imus, Cavite niadtong Oktubre 16.

Ayha niini, markado ang kadaugan sa pipila ka unyon sa Laguna sa pagduso sa katungod ug kaluwasan sa mga mamumuo dihang gipabalik sila sa trabaho niadtong Mayo. Napaduso, panaglitan, sa unyon sa Gardenia (pabrika og pan), ang maneydsment sa kumpanya nga hatagan og suhol ang mga mamumuong napugos nga magkwarantina. Nahimo usab sa unyon sa Daiwa (pabrika sa elektroniks) nga iduso sa kumpanya nga ihatag sa mga mamumuo ang 50% sa ilang suhol niadtong unang gipatuman ang *lockdown*. Nakakab-ot usab ang mga mamumuo sa Nexperia (pabrika sa elektroniks) ang benepisyong panglawas nga napadaug sa ilang unyon. Ilalum niini, napaduso nila ang pagbaton og libreng testing sa mga mamumuo ug uban pang benepisyong aron himuong luwas ang ilang pabrika.

IRR sa ATA, gipagula na

GIPAGULA NA SA Department of Justice ang Implementing Rules and Regulations (IRR) sa Anti-Terrorism Act (ATA) niadtong Oktubre 18. Nahisukip dinhi ang mga detalye sa pasistang mga probisyon sa balaod nga kanhi nang gisalikway sa katawhan.

Nakasulat sa IRR nga dili niini ilhon nga terorismo ang pagprotesta ug uban pang pagduso sa mga katungod, apan sa kundisyon lamang nga wala kiniy tinguhang "hadlukon ang publiko" o "magbutyag og mensahe sa kahadlok" ug kung unsa pang hinungdan nga mamahimong arbitraryong itakda sa rehimen.

Gihatagan niini og walay limitasyong gahum ang ibutang sa presidente nga Anti-Terrorism Council nga maoy magpunting kung kinsa ang mga terorista ug obligahon ang tanan nga pamatud-an nga wala silay sala. Wala kiniy kalainan sa ginahimo sa militar sa kabanikanhan kung asa ginaila nga mga "myembro sa BHB" ang mga sibilyan ug ginapugos sila nga "mosurender" aron "tin-awon" ang ilang mga pangalan. Lapas kini sa pinakabata kang mga katungod-sibil ug ginabaliktad ang internasyunal nga mga lagda sa mga prosesong hudisyal.

Bulan sa mag-uuma, gisaulog sa Mendiola

Kapin usa ka libong mag-uuma sa pagpasiugda sa Kilusang Magbubukid ng Pilipinas ug ilang mga tigsuporta ang nagmartsa padulong sa Mendiola niining Oktubre 21 isip kabahin sa pagdumdum sa Bulan sa Mag-uuma. Gipanawagan nilang "Tapuson ang paantus, mapasagaron ug pasistang rehimeng Duterte!"

Matud nila, *guilty* si Duterte sa mga krimen batok sa mga mag-uuma. Nagbaktas ang mga mag-uuma gikan sa Bulacan, Bataan, Pampanga, Tarlac, ug Rizal ug mga mangingisda gikan sa Cavite aron mosalmot sa protesta.

Nagpahigayon usab og protesta ang mga mag-uuma sa Batangas, Iloilo, Camarines Sur, Albay, Masbate ug Sorsogon atubangan sa mga lokal nga upisina sa National Food Authority aron iduso nga patas-an ang presyo sa humay.

Ayha niini, nagpiket ang mga myembro sa KMP atubangan sa Department of Agrarian Reform niadtong Oktubre 15 ug 16.

Mamumuong panglawas. Usa ka protesta sa mga ospital nga gitawag og "Protest from Ward" ang gilunsad niadtong Oktubre 9. Nakig-hiusa dinhi ang mga mamumuo sa Philippine Children's Medical Center, National Center for Mental Health, Tondo Medical Center ug uban pa.

Nagprotesta ang mga myembro sa Jose Reyes Memorial Medical Center Employees Union niadtong Oktubre 13. Gibatikos nila ang pag-usik-usik

sa pondo sa Department of Health nga nasutang adunay nakapondong expired nga mga tambal ug suplay nga nagkantidad og ₱2.2 bilyon sa kinatibuk-an. Gidumdum usab nila ang ilang lider nga si Judyn Bonn Suerte nga mipanaw niadtong Hulyo 31 human matakdan sa Covid-19 samtang nagserbisyo sa maong ospital.

Mamumuo. Nagpiket ang mga mamumuo sa Robina Farms kauban ang Kilusang Mayo Uno atubangan sa upisina sa National Conciliation and Mediation Board sa Intramuros, Manila niadtong Oktubre 12 aron babagan ang nanghulgang pagpangtang sa kumpanya. Planong tangtangan sa maneydsment ang 292 ka mamumuo sa Robina Farm 11 sa Antipolo City, Rizal sa hinungdang "nalugi" na kuno ang kumpanya.

Kabus sa kasyudaran. Nagmartsa ang lain-laing progresibong organisasyon sa pagpanguna sa Kalipunan ng Damayang Mahihirap padulong sa Mendiola sa Maynila niadtong Oktubre 12 aron babagan ang umaabot nga mga demolisyon sa Intramuros, Tondo ug uban pa. **AB**



THAILAND

Napuloan ka libong Thai, kadaghanan nga kabatan-onan, ang padayon nga nagprotesta sa Bangkok sukad pa niadtong Hulyo aron iduso ang pagpaluwat sa ilang punong ministro, paglusaw sa tibuok parlyamento, ug paglunsad og eleksyon ug paghimo og bag-ong konstitusyon. Nanawagan usab sila nga ireporma ang monarkiya ug tangtangan ang mga balaod nga nagabawal sa pagmakmak sa hari ug uban pang pyudal nga kamandoan. Daghan na sa mga lider niini ang giaresto ug gipreso. Niining Oktubre, mitumaw na usab ang mga protesta sa lain pang bahin sa nasud.

INDONESIA

Liboan ka mamumuo ug kabatan-onan ang misalmot sa tulo ka adlaw nga nasudnong welga sukad Oktubre 8 batok sa bag-ong nasumiteng Omnibus Job Creation Bill, Nahisukip sa maong sugyot balaodnon ang pagkibhang sa lapas sa katunga sa kanhi nang gitakdang *severance pay* ug pagtanggap sa nasudnong minimum nga suhulan isip pabor sa mosulod nga mga kumpanya sa mina. Bangis nga gibungkag sa mga pulis ang mga rali sama sentrong syudad sa nasud ug gatasan ang giaresto.

Yuta isip kapital, dili para sa pag-uma

DAW KAMPEON SA repormang agraryo ang World Bank sa duso niining ipatitulo ang mga indibidwal nga parsela sa yuta, usa ka dugay na nga duso sa gagmayng mag-uuma. Sa Africa, Latin America ug Asia, ginapondohan niini ang pagpapasas sa mga proseso aron kuno paglagsikon ang pagpamuhunan sa agrikultura.

Sa Pilipinas, giaprubahan niini niadtong Hulyo ang \$370 milyong pautang alang sa iskemang Support to Parcelization of Lands for Individual Titling (SPLIT) sa rehimeng Duterte. Target sa maong iskema nga bungkagon ang mga titulong hinusang gipanag-iyahan sa daghang benepisyaryo o ang mga gitawag og "collective certificate of land ow-

nership award (CLOA)." Matud sa datos sa estado, 53% lamang sa mga yutang giapud-apud sa milabayng halos upat ka dekada ang adunay indibidwal nga titulo. Ang 1.4 milyong ektarya, nga gipanghatag sa 750,000 ka mag-uuma, langkob sa lain-laing kolektibong CLOA.


Ang laraw sa pagpanghatag sa

indibidwal nga titulo mao nga aron pasayonon ang balwasyon, pagbaligya ug sa dili madugay kumbersyon sa mga yutang agrikultural. Kini aron liyukan ang limitasyon sa mga titulong kolektibo nga dili mamahimong gamiton isip kolateral sa pagpangutang sa mga bangko ug sa ingon dili pwedeng maremate. Pasayonon usab niini ang pagpaningil og buhis sa kabtangan sa mga lokal nga gubyerno. Dugang pabug-at kini sa mga mag-uumang nalubong sa utang tungod sa dakung gasto sa produksyon ug ubos nga presyo sa mga produktong agrikultural. **AB**

Hustisya para kang Baby River ug Ina!

Mikaylap ang panawagang hustisya ug pagbatikos sa daw mananap nga pagtrato sa rehimeng Duterte sa detenidong pulitikal nga si Reina Mae (Ina) Nasino ug iyang tulo ka bulang anak nga si River nga mipanaw niadtong Oktubre 9 sa sakit nga *acute respiratory distress syndrome*.

IHuman kini sa pipila ka beses nga gihikaw sa mga upisyal sa rehimen ang katungod ni Reina Mae nga makauban ug maatiman ang anak. Una, wala siya gitugutan nga magdugay sa Dr. Jose Fabella Memorial Hospital dihang nanganak siya. Pwersahan sila nga gibulag human ang usa ka bulan, sa panahon nga kinahanglang kaayo sa bata ang gatas sa iyang inahan. Dihang nagsakit ang bata, pipila ka hugna nga gibalibaran sa rehimen ang mga petisyong gihapon sa mga abugado ni Rei-



na Mae aron makitang buhi ang anak sa ulahing higayon.

Ulahi na nga gitugutan sa rehimen si Ina nga makabisita sa anak, apan imbes nga tulo ka adlaw, tigtulo ka oras lamang sa haya ug lubong ang gihatag kaniya. Gipasuot og PPE, nakaposas ug bantay-sirado siya sa kapin 40 ka armadong gwardya ug pulis dihang una niyang gibisita ang haya sa iyang anak niadtong Oktubre 13.

Sa adlaw sa lubong niadtong Oktubre 16, gimando sa mga pulis ang gisakyan sa lungon ni Baby River ug gida-

gan ang lungon. Giharang usab sa 100 ka pulis ug ginsakpan sa BJMP ang pamilya ug mga tigsuporta sa mag-inahan sa pakighiusa sa martsa aron manawagan og hustisya. Hangtud sa sementeryo, wala gitangtang sa mga gwardya ang posas ni Reina Mae aron man lang magunitan sa ulahing higayon ang anak. Aron kundenahon ang pagmaltrato sa pulis, nagprotesta ang mga paryente ug tigsuporta sa mag-inahan sa sementeryo kadungan sa lubong.

Iligal nga giaresto si Reina Mae, kauban ang duha pa ka aktibista sulod sa upisina sa Bayan-NCR sa Tondo, Maynila niadtong Oktubre 31, 2019 sa usa ka malukpanong *crackdown* batok sa mga aktibista. Gipasakahan sila og gama-gamang kasong *illegal possession of firearms and explosives*. AB

Bata, gipusil sa militar sa Bukidnon

Samaron ang usa ka bata sa walay paturagas nga pagpamusil sa mga sundalong gituohang myembro sa 8th IB sa Upper Pulangi, Barangay Indalaza, Malaybalay City, Bukidnon niadtong Oktubre 16.

Gipahigayon ang pagpangatake isip balos sa taktikal nga opensiba sa mga Pulang manguubat. Sulod sa usa ka oras, giistraping sa mga sundalo ang mga balay, payag ug umahan sa erya ug gitarget ang kinsa mang makit-an. Lakip sa gipabuthan si Jemlyn Liaban, 10-anyos, nga naigo sa bala sa tiil, ug si Jessica Limpyo nga karga ang anak sa panghitabo. Nag-ani og mais ang mga biktima uban sa siyam pa nilang paryente dihang nahitapo ang pagpamusil.

Human niini, midiretso ang mga sundalo sa sentro sa barangay ug gikulata ang residenteng si Titi Limbos. Gihagit usab nila og sinumbagay ang lider sa Matripona, usa ka lokal nga relihiyosong grupo. Nataho usab nga gikanyon sa militar ang lugar niadtong Oktubre 15 ug 16.

Sa Camarines Sur, gipatay sa

83rd IB ang sibilyan nga si Joana Marpiga sa iyang balay sa Barangay Mangga, sa lungsod sa Bato. Giakusahan siya nga myembro sa Bagong Hukbong Bayan (BHB).

Pagpamomba. Niadtong Setyembre 30, gikanyon sa 20th IB ang humayan sa mga residente sa Sityo Canonghan, Barangay Osmeña, Palapag, Northern Samar. Milungtad kini og halos 15 ka oras. Giistraping usab sa militar ang umahan sa mga mag-uuma sa Barangay Bagacay.

Ayha niini, upat ka beses nga nagpabuto og mortar ang mga sundalo sa Oras River ug Barangay Siljagon sa lungsod sa Mapanas. Gipailalum usab sa 20th IB sa kontrol niini ang maong barangay sa takuban sa "Retooled Community Support Program." Gibawalan ang mga mag-uuma nga mogawas aron

mag-ani og humay ug arbitraryong ginaaresto ang mga mosupak.

Sa Western Samar, naguba ang balay sa usa ka mag-uuma ug namatay ang iyang duha ka iro sa pagpanganyon sa 19th IB sa Barangay San Isidro, Matuguinao niadtong Setyembre 26. Naigo usab sa pagpanganyon ang bahin sa komunidad nga duul sa eskwelahan.

Pag-aresto. Arbitraryong giaresto sa 8th IB ang 16 ka residente sa Sityo Ulayanon, Barangay Kalabugao, Impasug-ong, Bukidnon niadtong Agosto. Gidala sila sa kampo sa batalyon sa Impasug-ong ug gidetine sa halos usa ka semana aron pugson nga "mosurender."

Sa Surigao del Sur, giharang ang sakyanan ug giaresto sa mga elemento sa pulisya ug 36th IB ang lima ka mamumuo sa ABI, usa ka kumpanya sa konstruksyon, niadtong Oktubre 14 sa Sityo Hubason, San Vicente, Carmen. Giakusahan sila nga nagadala og mga gamit pang-eksplusibo ug suplay sa BHB. AB

Paantus nga *distance learning*

Urum ang nasinati sa mga magtutudlo, estudyante ug ginikanan sa unang tulo ka semana sa “*distance learning*” sukad Oktubre 5. Sila ang nakahiagum sa kalisud nga bunga sa patung-patong nga problema ug paantus tungod sa pagpasagad sa rehimeng Duterte sa pag-atubang sa Covid-19 ug mga epekto sa pandemya sa edukasyon. Labaw nga gipataw sa grabeng problema sa *distance learning* ang kapalpakan ni Duterte.



Gipanghinambog ni Sec. Leonor Briones sa Department of Education (DepEd) nga malampuson kuno ang balik-eskwela sa kapin 24 milyong estudyante. Luyo kini sa nagtipun-og nga mga reklamo nag-una sa kakulangan sa mga modyul ug mga depekto niini, hilabin ka hinay nga signal sa *internet* ug kakulangan sa mga gamit alang sa mga estudyante, pagpahimulos sa mga magtutudlo ug uban pa.

Kulang kaayo ang mga giimpren-tang modyul sa DepEd. Natukmod na ang daghang magtutudlo sa mga pangpublikong eskwelahan nga mag-imprensa sa kaugalingon nilang mga modyul ug iapud-apud kini sa mga estudyante gamit ang kaugalingong pondo. Hilabihan ka ubos ang gigahin nga badyet sa sentral nga upisina sa mga eskwelahan sa distrito.

Niadlong Oktubre 14, giangkong mismo sa upisyal sa DepEd sa Kongreso nga imposible ang padayon nga

blended learning gamit ang modyul. Sa tulo ka bulan pa lang, manginahlangan na og 1.1 bilyong modyul alang sa tanang 22.4 milyong estudyante. Tungod niini, mapugos ang DepEd nga ibalhin sa *digital learning* ang mga estudyanteng nagsalig sa modyul. Kapin 70% sa mga nag-enrol ang gipiling magtuon gamit ang mga modyul tungod kay wala silay mga *gadget* ug *internet*.

Gireklamo usab sa mga estudyante ug ilang mga kapamilya ang pagtipun-og sa mga asignatura nga walay igong tabang sa pagtubag niini. Matud sa ACT Teachers Partylist, dili angay basulon ang mga magtutudlo sa *burnout* o *stress* nga nasinati sa mga estudyante ug ginikanan tungod kay bunga kini sa pagpamugos sa DepEd nga ipatuman ang kurikulum nga gihimo alang sa *face-to-face* (inatbangay) nga pagtuon ug dili alang sa *distance learning*.

Pakyas ang DepEd dili lamang sa paghatag sa igo ug dekalidad nga mga modyul, kundili sa mas batakan pang pagtibuok sa kinahanglang kurikulum nga haum alang sa bag-ong sistema sa pagtuon. Wala usay tinaw nga giya ang DepEd alang sa oras sa pamuo sa mga titser, ug giobligna hinuon sila nga kanunay naka-“on” o pwedeng tawagan—24 oras, pito ka adlaw sa usa ka semana—sa mga pangutana sa mga estudyante ug sa ilang mga ginikanan. Gipadali-dali sila sa paghimo og mga modyul alang sa telebisyon nga mikabat sa kapin 200 ka bidyo matag semana, apan walay igong suporta kanila.

Walay gigahing pondo ang DepEd alang sa kaluwasan sa mga magtutudlo. Sa Cagayan Valley, nataho ang natakdan nga kapin 200 ka magtutudlo nga nanghatag og modyul nga walay proteksyon batok sa Covid-19. AB

Pagpahimulos sa Amazon sa baratong kusog-pamuo sa Pilipinas

SA MILABAYNG UNUM ka bulan, panawagan sa mga *call center agent* sa sangay sa Teleperformance sa Cebu, nga dugangan ang mga lakang sa ilang upisina aron magpahaum sa mga hulga nga dala sa Covid-19, Ang Teleperformance usa ka kumpanyang French nga gikontrata sa Amerikanong kumpanyang Amazon isip *call center* niini. Aduna kini 22 ka upisina sa Pilipinas.

Niadlong Abril, gireklamo nila ang kakulangan sa akomodasyon sa ilang trabaho ug kalisud sa transportasyon bunga sa pagbawal sa pagpamasada sa *dyip* ug *curfew*. Wala sila gitugutan nga magtrabaho sa balay tungod sa palisiya sa Amazon batok niini. Human magreklamo, labaw pang migrabe ang ilang sitwasyon.

Imbes nga hatagan og haum nga mapuy-an, gibawal sa kumpanya ang pagtulog sa salug sa upisina ug gipwersa sila nga mangabang sa kasikbit nga erya. Tungod niini, 20% sa ilang suhol mapadulong sa abang.

Padayon silang ginapatrabaho sa piot ug naka-*aircondition* nga upisina kung asa imposible ang

physical distancing. Dili regular ang disimpeksyon sa ilang mga lamesa ug sa ginagamit nila nga mga kompyuter. Daghan na ang nagki-taan og sintomas sama sa ubo ug hilanat, apan wala sila ginatagad. Walay *mass testing*. Ginapauli lang ang mga natakdan ug wala gisuhan. Wala nasayod ang mga mamu-muo kung husto ba nga ginareport sa kumpanya ang kahimtang nila sa Department of Health.

Lakip ang Teleperformance sa mga kumpanyang gitugutang magpabiling abli sa tibuok panahon sa pandemya, bisan pa og dili kini “*e-sensyal*” sa lokal nga ekonomiya.

Kahimtang sa mga migrante taliwala sa pandemya

Lakip ang sektor sa mga migranteng Pilipino o *overseas Filipino worker* (OFW) sa hilabihan nga ginatamparus sa kalibutanong resesyon nga gibunga sa pandemyang Covid-19. Karong bulana, mikabat na sa 250,000 OFW (o halos 1/3 sa kinatibuk-ang ihap) ang natukmod nga mouli sa Pilipinas human nga mawad-an og trabaho. Lakip sila sa mokabat sa 400,000 ka OFW nga nawad-an og trabaho panahon sa pandemya. Gibanabana nga modaku pa ang ihap sa mawad-an og trabaho ngadto sa usa ka milyon hangtud sa mosunod nga tuig.

Sa pinakaulahing datos sa reaksyunaryong gubyerno niadtong Oktubre 17, mikabat na sa 11,146 ang kinatibuk-ang ihap sa mga migranteng nagpositibo sa Covid-19. Sa kinatibuk-an, gibanabana nga adunay 811 ka OFW na ang namatay tungod sa bayrus.

Daku ang epekto sa pagkawala sa trabaho sa mga OFW sa ilang mga pamilya tungod kay kadaghanan kanila nag-unang nakasalig sa remitans aron tubagon ang ilang mga bata-kang panginahanglan. Matud sa Consumer Expectation Survey sa reaksyunaryong estado, 94% sa mga pamilya sa mga OFW ang nagsalig sa remitans isip panggasto sa pagkaon ug sa balay, 67% sa edukasyon, 51% sa gasto pangmedikal ug 17% isip pangbayad sa utang.

Nagresulta ang malukpanong disempleyo sa han-ay sa mga migrante sa pagtiurok sa kinatibuk-ang remitans sa nasud sa milabayng walo ka bulan. Matud sa pinakaulahing taho sa Bangko Sentral ng Pilipinas, miubos kini og \$585 milyon (P29.3 bilyon) kumpara sa natahong \$22 bilyon (P1.1 trilyon) sa parehong mga bulan niadtong 2019. Ginadahum ang labaw pang pagkahagba niini kadungan sa padayon nga pagpangdaut sa pandemya ug pagsirado sa mga negosyo sa lain-laing bahin sa kalibutan. Itukmod sa maong problema ang apektadong pamilya sa mga OFW nga mas magtipid taliwala sa krisis.

Aron pagawason nga adunay pagtagad ang rehimen sa sektor, gipanghinambog sa Department of Labor and Employment (DOLE) niadtong Oktubre 16 nga naayuda-

han na kuno ninii ang 291,952 ka apektadong migrante ilalum sa programang gitawag og "Abot Kamay ang Pagtulong." Nagareklamo ang mga OFW nga hilabihan ka gamay ug kulang ang P10,000 nga ayudang ilang nadawat aron mabagan ang ilang mga pamilya. Kung tungaon sa walo ka bulan nga nawad-an sila og trabaho, katugbang lamang ang ayuda sa P42-kompensasyon kada adlaw. Igo lamang kini aron makapalit og usa ka kilong bugas.

Ang gatusan ka libong migranteng nakauli na sa ilang mga prubinsya ang nahimong kabahin na karon sa lokal nga hukbo sa mga walay trabaho. Sama sa uban pang mga mamumuo, daghan kanila ang nagadiskarte na lang para malabngan ang krisis. Gamit ang nahabiling tinigum, ang pipila kanila nagtukod og gagmayng mga tindahan ug uban pang negosyo.


Gatusan ka libo usab ka OFW ang nagpabiling istranded sa ilang mga gitrabahoang nasud ug nakalabang lamang pinaagi sa inisyatiba

sa pareho nilang migrante ug mga donasyon. Pananglitan niini ang libreng pagpanghatag og pagkaon, tambal ug uban pang materyal nga ayuda sa mga balangay sa Migrante ug mga igsoon niining organisasyon. Mas kasagaran, wala silay nadawdaw sa mga Pilipinong upisyal sa embahada. Alang sa mayorya kanila, dili opsyon ang pag-uli sa Pilipinas. Limitado ug grabe ka mahal ang pamasaha sa eroplano. Daghan kanila ang wala pa nakabayad sa ilang *placement fee* (bayad sa ahensyang nagpagawas kanila sa nasud) nga mamahimong mokabat og \$10,000 (P500,000).

Labaw pa dinhi ang nasinati sa mga migranteng walay papeles o ilegal nga nagatrabaho sa ubang nasud. Kadaghanan kanila ang nagatrabaho ilalum sa kahimtang "no work, no pay" isip mga tiglimpyo, *caregiver* ug tighatag og uban pang personal nga serbisyo. Tungod kay walay papeles, dili sila kwalipikadong modawat sa mga benepisyo sama sa subsidyo alang sa mga nawad-an og trabaho, serbisyon panglawas ug uban pang ayuda. Sukad nga gipahamtang ang mga *lockdown*, nagpabilin sila sa balay sa ilang mga amo, kung asa ginapatrabaho sila og lapas sa gitakdang oras sa pamuo nga walay bayad. Dili sila makauli, tungod kay walay panginabuhian ang ilang mga pamilya sa Pilipinas. AB




SA MUBONG PAGKASULTI



7 sa matag 10

ka babayeng Pilipino ang nakasinati og pagpangbastos *online*, kadaghanan nag-edad 15-20.



119%


pagtaas sa ihap sa mga tawag sa *hotline* alang sa mga tawong nakasinati og problema sa hunahuna o *mental health problem* sa panahon sa pandemya.

Nagpasabot kini nga mas daghang tawo ang nakasinati og depresyon, *anxiety* ug/o gusto nang magpakamatay.

Gikan sa: National Center for Mental Health, Agosto 2020

690 Milyon

ihap sa mga tawong gakatulog nga gutom adlaw-adlaw sa tibuok kalibutan tungod sa kawad-on sa pagkaon.



Gikan sa: Food and Agriculture Organization

115 Milyon

gibanabanang makasinati og grabeng kalisud sa tibuok kalibutan karong 2020.

Gikan sa: World Bank, Oktubre 2020.

1 sa matag 4

ka mamumuong kabatan-onan sa tibuok kalibutan ang nawad-an og trabaho sa panahon sa pandemya.

Gikan sa: International Labor Organization, Agosto 2020

53%

o 3,388 sa 6,321 nga namatay sa Covid-19 ang wala na nakaabot sa ospital ug

Gikan sa: Department of Health, Oktubre 2020.

75%

sa mga kritikal ang wala na gipaospital bisan og naa pa kunoy mga katre alang kanila.

Dili moubos sa

289

napatay nga pasistang tropa sa rehimeng Duterte o katugbang sa 1 gamayng batalyon sa mga armadong panagsangka sa BHB gikan Enero hangtud Oktubre.

Oktubre 20, 2018

Adlaw nga gimasaker ug gisunog sa mga paramilitar ang siyam ka mag-uuma nga kabahin sa bungkalan sa Hacienda Nene, Sagay, Negros Occidental sa insidenteng gitawag og Sagay Masaker.




\$20.63 TRILYON

Gibanabanang abton sa pederal nga utang sa US karong tuiga.

Mas daku na kini (106%) kumpara sa lokal nga ekonomiya sa nasud.

Gialirungan sa grabeng krisis ang imperyalismong US

Minilyong Amerikano ang nakatakdang mobotar sa ika-59 nga presidensyal nga eleksyon sa umaabot nga Nobyembre 3. Ipahigayon ang maong eleksyon taliwala sa pandemya ug sa naghaguros nga kalihukang kontra-rasismo nga gibunga sa nagapadayong brutalidad ug sistematikong pagpangdaugdaug sa katilingbang Amerikano sa mga Itum. Ang duha, kadungan sa grabeng krisis sa kapitalismo nga nagdomina sa wala pa ang pandemya, ang kasangputan karon sa katawhang Amerikano.



Magkaatbang sa eleksyon silang Donald Trump, kasamtangang presidente ug representante sa partidong Republican, ug Joseph Biden, representante sa partidong Democratic. Daghan ang nabalaka nga manglimbong si Trump sa eleksyon ug dili siya monaog sa pwesto bisan og mapildi pa siya sa botohay. Subay kini sa subli-subli niyang deklarasyon nga ang bugtong pamaagi aron mapildi siya mao nga kung limbongan ang eleksyon.

Sa daghang sektor ug lugar, hinay-hinay na nga nagasaka ang ihap sa mga andam nga mobotar kang Biden aron lang matangtang sa pwesto si Trump. Ginaila niining "pasiunang lakang" sa pagduso sa mga reporma ug kausaban alang sa kaayuhan sa mga mamumuong Amerikano. Nakita usab nila kini isip higayon aron palig-onon ang ilang han-ay ug iduso ang ilang makatarunganon ug dugay nang mga reklamo sa suhulan, trabaho, edukasyon, pabalay, laba pang pagnag-angay-angay ug uban pang katungod ilabina taliwala sa pandemya.

Dili mapalong nga pandemya

Usa ang US sa mga nasud nga hangtud karon wala pa gihapon nakaluwas sa pandemyang Covid-19. Matud sa Lancet, usa ka mantalaang medikal, palpak ang US sa pagpugong sa pandemya tungod sa dili ligo ug dili tin-aw nga tubag sa guberno niini. Luyo kini sa pagbaton sa US sa abanteng mga ahensya sa panukiduki ug pagsumpo sa mga sakit nga ginaila ug ginatahod sa tibuok kalibutan.

Sukad Mayo, ang US ang nahimong kalibutanong sentro sa pan-

demyang Covid-19. Kini ang adunay pinakataas nga ihap sa mga natakdan (8.1 milyon) ingonman sa namatay (220,000).

Ginabasol sa dakung bahin sa katawhang Amerikano ang palpak nga tubag ni Trump sa pandemya nga gitawag nila og "populismong medikal." Niadto pang Mayo nana-wagan ang mga duktor sa Lancet nga pulihan na si Trump ug pakusgon ang mga ahensyang panglawas sama sa Center for Disease Control (CDC). Matud nila, bisan og adunay mga kasipyatan ang CDC sa sinugdanan, labaw nga miatras ang pag-atubang sa US dihang gipadaplin ni Trump ang ahensya. Lakip sa mga kahuyangan sa US ang mga kasipyatan sa *mass testing*, paggamit sa dili masaligang *test kit* ug hilabihan ka langay nga pagproseso ug pagpagawas sa resulta sa daghang *test*.

Sigon sa datos sa CDC, pina-kaapektado sa Covid-19 ang mga Itum ug katawhang adunay kolor (dili puti). Halos tulo ka beses sila nga mas natakdan, lima ka beses nga mas gakaospital ug duha ka beses nga mas gakamatay sa Covid-19 kumpara sa mga puti. Tungod kini sa sistematikong diskriminasyon; kawalay akses sa serbisyong panglawas; kawalay kaluwasan sa mga trabaho; dakung gintang sa kita, edukasyon ug bahandi; ug kulang og piot nga pabalay.

Krisis sa panginabuhian

Gibunga sa pandemya ang pina-kagrabeng krisis sa trabaho sa kasaysayan sa US. Kapin 58 milyong katawo sa nasud ang nagdeklarang nawad-an sila og trabaho sukad Mayo. Sa usa ka panahon, mikabat

sa 150 milyong Amerikano ang gikinahanglang hatagan og subsidyo aron buhion ang tagsa-tagsa nilang mga pamilya. Pinakadaghan sa mga nawala ang mga trabahong ubos ang suhulan sa sektor sa *retail*, personal nga serbisyo, transportasyon ug turismo. Gigunitan sa mga kababayan-an ang 2/3 sa maong mga trabaho, ug mayorya kanila mga babaeng adunay kolor.

Gibanabana nga 42% sa mga trabahong temporaryong nawala sa pagsugod sa pandemya ang hingpit na nga mawala. Niadtong Setyembre, nataho nga anaa sa 40%-45% pa lamang sa mga trabahong gipatuman sa mga puti ang nabalik. Anaa sa 20% usab sa mga trabaho sa mga Itum ug uban pang katawhang adunay kolor ang narekober.

Kadungan sa kawad-on sa trabaho ang pag-ubos sa kita sa mga propesyunal ug nagatrabaho sa mga upisina. Sa usa ka pagtuon niadtong Hulyo, gibanabanang anaa sa 20 milyong mamumuo ang nagdawat sa mas ubos nga suhulan. Kapin 10 milyon ang gikaltasan ang suhulan gikan sa 5% hangtud 50%. Napugos nalang ang uban nga magtrabaho nga kulang ang oras ilalum sa mga pleksibleng kahimtang sama sa "work from home."

Ang taas nga tantos sa walay trabaho nagpasabot nga mas daghang Amerikano ang gigutom, gikabalak-ang mawad-an og puloy-anan ug walay akses sa batakang mga katilingbanong serbisyo, lakip ang medikal.

Matud sa mismong datos sa rehimen niadtong Hulyo, 30 milyong

"Gialirungan...", *sundi sa panid 10*

Bahandi sa mga bilyunaryo, midaku pa sa panahon sa pandemya

Samtang nahagba ang kita ug nawad-an og paninabuhian ang minilyong Amerikano, miburot usab ang bahandi sa nag-unang mga bilyunaryo sa US. Matud sa duha ka pribadong panukiduki, misaka og \$850 bilyon ang bahandi sa kapin 600 ka bilyunaryong Amerikano gikan Marso hangtud Oktubre 12. Kapin \$1 trilyon ang giusang nadugang sa bahandi sa 12 ka nag-unang bilyunaryong Amerikano. Doble ang maong kantidad sa kinatibuk-ang ayuda nga ginahatag sa guberno sa US sa 150 milyong Amerikanong nawad-an og trabaho sukad Marso.

Nag-una sa listahan si Jeff Bezos, tag-iyá sa Amazon, usa ka kumpanyang nagabaligya og klase-klaseng produkto gamit ang *internet*. Nadugangan ang iyang bahandi og 40% o \$73.2 bilyon. Nahitabo kini samtang liboan sa iyang mga mamumuo ang nag-antus tungod sa dili luwas nga mga kundisyon sa pamuo. Niadtong Setyembre, mikabat na sa 20,000 ka mamumuo sa mga bodega sa Amazon ang nagkasakit sa Covid-19. Padayon ang paghatag og labing ubos nga suhulan sa mga trabahador, nga kadaghanan kontraktwal ug

kulang ang mga benepisyo.

Misunod kaniya si Elon Musk nga nanag-iyá sa kumpanyang Tesla, nga mikita og \$67.4 bilyon, o halos triple sa bahandi niya sa pagsugod sa tuig. Pugos nga gikibhang ni Musk og 10% hangtud 30% ang suhulan sa tanan niyang mga mamumuo sukad pa niadtong Abril. Gisanté niya ang 3,000 ug temporaryong wala gipatrabaho nga walay bayad ang liboan pa.

Kauban nilang nakatagamtan og husto sa pandemya silang Bill Gates (Microsoft), Mark Zuckerberg

(Facebook) ug Warren Buffet (Berkshire Hathaway).

Sa tibuok kalibutan, nataho niadtong Oktubre 7 nga miburot ang kinatibuk-ang bahandi sa 2,189 pinakaadunahang indibidwal (kauban ang naunang nahisgutan) og 27.5% sulod lamang sa upat ka bulan. Misaka kini gikan \$8 trilyon niadtong Abril ngadto sa \$10.2 trilyon niadtong Hulyo nga pinakataas nga nataho sa kasaysayan sa kalibutan.

Sa Pilipinas, pinakadaku ang giburot sa bahandi sa burges kumprador nga si Edgar Sia II, ang ika-21 nga pinakaadunahang Pilipino. Miburot ang iyang bahandi og 75% o mitaginting nga ₱14.6 bilyon sulod lamang sa usa ka tuig, mula ₱19.5 bilyon niadtong 2019 ngadto sa ₱34.1 bilyon sa kasamtangan. Si Sia ang nanag-iyá sa CityMall, MerryMart ug DoubleDragon Properties Corp. **AB**

"Gialirungan...", gikan sa panid 9

Amerikano ang nagsulting nakasinati sila og kagutom, triple sa ihap niadtong milabayng tuig. Gibanabana usab nga 52 milyon ang walay kasigurohan sa pagkaon. Makita kini sa milya-milyang naglinya sa mga *food bank* (mga manghatag og pagkaon) ug gatusan ka beses nga pagdaghan sa mga tawong ginaserbisyuhan sa mga *food kitchen* (mga kan-anan nga libreng nagapakaon sa mga walay mapuy-an ug uban pang kabus).

Pinakagrabe ang insidente sa kagutom sa han-ay sa mga bata, nga misaka sa 14 ka beses kumpara sa milabayng tuig.

Sa unang mga bulan sa pandemya, anaa sa 27 milyong Amerikano na ang nawad-an og *health insurance*. Gawas pa kini sa minilyong Amerikano nga walay *health insurance* sa wala pa ang pandemya. Kadungan niini, 30 milyon hangtud 50 milyong Amerikano ang hulgang mawad-an og puloy-anan tungod sa kawad-on sa katakus nga magbayad og abang. **AB**

Miulbo nga kalihukang anti-rasismo

GIKAN MAYO 22 hangtud Agosto 24, atol sa pandemya sa nasud, mikabat sa 7,750 ang natahong protesta sa Black Lives Matter (BLM) sa kapin 2,000 ka lokasyon sa tanang 50 ka estado sa US. Kadaghanan (93%) sa maong mga protesta malinawon, ug mongsangpot lamang sa kasamok o kabangis kung ginabungkag sa mga pulis o ginahilabtan sa maki-Trump nga mga indibidwal o grupo.

Sa mga protesta, 392 ang bangis nga gibungkag sa mga pulis ug paramilitar sa mando ni Trump. Napuloan usab ang gitugaw pinaagi sa tinuyong pagligis sa mga tawo sa mga rasistang indibidwal, pwersang pangseguridad sa estado o myembro sa rasistang grupong paramilitar sama sa Patriot Prayer, Three Percenters ug Proud Boys nga parehong lunod-patay nga tigsuporta ni Trump.

Bisan og mihubas na ang mga protesta gikan pungkay niini niadtong Hunyo, napuloan pa gihapon nga protesta ang nataho kada semana.

Miulbo ang kalihukang BLM karong tuiga human gipatay sa mga pulis si George Floyd, samtang ginaaresto siya sa kaso sa paggamit sa pekeng kwarta, niadtong Mayo 25. Luyo sa higanteng mga demonstrasyon human niini, nagpadayon ang brutalidad sa pulis sa mga Itum, nga nagresulta sa unom pang gipatay pagsulod sa Agosto 26. Lakip sa mga biktima si Breona Taylor, usa ka paramedik nga gipusil sa mga pulis samtang natulog sa balay tungod kay nasaypan siyang kriminal.